

BOSNA I HERCEGOVINA
FEDERACIJA BOSNE I HERCEGOVINE
PARLAMENT FEDERACIJE
DOM NARODA
Broj: 02-02-668/09
Sarajevo, 9.07.2009. godine

Z A P I S N I K
**23. SJEDNICE DOMA NARODA PARLAMENTA FEDERACIJE BOSNE I
HERCEGOVINE, održane 02. juna i 9. jula 2009. godine**

Sjednica je počela u 10.30.

Sjednici je predsjedavao Stjepan Krešić, predsjedavajući Doma naroda Parlamenta Federacije Bosne i Hercegovine.

Na početku sjednice predsjedavajući je pozdravio: delegate, zamjenika premijera Vjekoslava Bevandu, ministre u Vladi Federacije Bosne i Hercegovine, predstavnike udruženja, sindikata, međunarodnih organizacija, goste i predstavnike akreditiranih medijskih kuća koji prate rad sjednice.

Izostanak sa sjednice opravdao je Jasenko Tufekčić.

Na osnovu evidencije Stručne službe, predsjedavajući je konstatovao da sjednici prisustvuju 42 delegata, što čini većinu, te da Dom naroda može raditi i punovažno odlučivati.

Prije prelaska na rad delegati su jednoglasno (42 glasa) i bez primjedbi usvojili Zapisnik 22. sjednice Doma naroda, održane 28. aprila i 12. maja 2009. godine.

Nakon toga predsjedavajući je podsjetio delegate da na osnovu člana 104. Poslovnika o radu Doma naroda mogu postavljati delegatska pitanja, pokretati inicijative ili izraziti nezadovoljstvo dobijenim odgovorima.

Delegatska pitanja i inicijative

Drago Puzigaća izrazio je nezadovoljstvo dobijenim odgovorom u vezi sa pokrenutom inicijativom koja se tiče ugroženosti rijeke Unac, odnosno pitke vode od koje zavise općine Bosansko Grahovo i Drvar i upozorio na nelegalnu sječu šuma u ovom području i zatražio od Federalnog tužiteljstva i nadležnog ministarstva da pokrenu određene radnje i aktivnosti u vezi sa ovim problemom.

Elvira Abdić-Jelenović rekla je da je Federalno tužiteljstvo od nje zatražilo određene podatke vezano uz pitanje koje se odnosilo na preduzeće "Agrokomerc" pa je zatražila od Vlade Federacije spisak svih nadzornih i upravnih odbora imenovanih u tom preduzeću od 1995. godine do danas, kao i iste podatke za sva preduzeća u kojima je titular Vlada Federacije.

Postavila je pitanje direktoru Agencije za privatizaciju u Federaciji Bosne i Hercegovine i direktoru Registra vrijednosnih papira u Federaciji Bosne i Hercegovine u vezi sa dostavljanjem kopije nalaza revizije vlasničke strukture koja je sastavni dio početne bilance "Agrokomerca" d.d. Velika Kladaša, te upitala direktora Registra vrijednosnih papira kada je "Agrokomerc" upisan u Registar vrijednosnih papira i ko je prema priloženoj dokumentaciji ovlaštena osoba za zastupanje "Agrokomerca" d.d. Velika Kladaša.

Mislav Sučić postavio je dva pitanja.

Prvo pitanje odnosi se na izvoz žive teladi u Republiku Hrvatsku te je upitao Federalno ministarstvo poljoprivrede, vodoprivrede i šumarstva šta će poduzeti da bi se omogućio izvoz.

Drugo pitanje tiče se iznosa sredstava koje je Razvojna banka Federacije Bosne i Hercegovine u 2008. godini usmjerila u Livanjski kanton - koliko je bilo aplikantata za ta sredstva, koliko je odobreno i koliko odbijeno sredstava, te koliko sve to iznosi u postocima.

Kenan Keserović postavio je dva pitanja.

Prvo pitanje upućeno je Federalnom ministarstvu obrazovanja i nauke u vezi sa izradom plana aktivnosti koji se odnosi na djecu sa posebnim potrebama, periodom za koji je donesen i rezultatima njegove primjene za prvi kvartal 2009. godine. Zatražio je da se u prilogu pisanog odgovora dostavi ovaj plan i naziv institucija koje su učestvovala u njegovoj izradi.

Drugo pitanje upućeno je Vladi Federacije i Federalnom zavodu za zapošljavanje u vezi sa poduzetim mjerama za zapošljavanje mladih u Federaciji, te je upitao da li se raspolaže sa tačnim brojem zaposlenih mladih u Federaciji zatraživši kvantitativni prikaz u kantonima, odnosno broj zaposlenih mladih u 2007.-2008. godini kao i u prvom kvartalu u 2009. godini. U prilogu pisanog odgovora zatražio je da se priloži kvantitativni prikaz zapošljavanja mladih u Federaciji i mjere poduzete za njihovo zapošljavanje.

Mirsad Pindžo zatražio je od Vlade Federacije da mu dostavi izvještaj o svim izmirenim obavezama Federacije na dan 31.12.2008. godine, a posebno je zatražio analitički pregled za Federalno ministarstvo za raseljene osobe i izbjeglice.

Edin Hozan postavio je dva pitanja Federalnom ministarstvu poljoprivrede, vodoprivrede i šumarstva.

Prvo pitanje odnosi se na nove vakcine koje se koriste prilikom vakcinisanja ovaca i koza, te da li je ova vakcina korištena u drugim zemljama i kakva su njihova iskustva.

Drugo pitanje odnosi se na neisplaćivanje premija za mlijeko za drugi i četvrti kvartal u 2008. godini.

Federalni ministar poljoprivrede, vodoprivrede i šumarstva Damir Ljubić odgovorio je na ova pitanja.

Igor Rajner postavio je dva pitanja.

Prvo pitanje odnosi se na zaštitu špilje Vjetrenice.

Drugo pitanje upućeno je Federalnom ministarstvu finansija u vezi sa sredstvima za vakcinaciju i zaštitu od bruceloze.

Federalni ministar turizma i okoliša Nevenko Herceg odgovorio je na prvo pitanje.

Ismet Imamović postavio je pitanje Federalnom ministarstvu poljoprivrede, vodoprivrede i šumarstva u vezi sa dostavljanjem spiska svih aplikacija za poticaje u 2008. godini.

Federalni ministar poljoprivrede, vodoprivrede i šumarstva Damir Ljubić odgovorio je na pitanja Igora Rajnera i Ismeta Imamovića.

Saša Magazinović izrazio je nezadovoljstvo što još nije dobio odgovore na pitanja postavljena na prošloj sjednici a koja se tiču informacije o voznom parku Vlade i Parlamenta Federacije i o problemu vezanom uz dionicu koridora Vc zatraživši hitne odgovore.

Postavio je pitanje Vladi Federacije - kolike su obaveze Federacije na osnovu potpisanih kolektivnih ugovora zatraživši njihov tabelarni prikaz i stupanj njihove provedbe.

Svetozar Pudarić postavio je dva pitanja.

Prvo pitanje postavljeno je Federalnom ministarstvu prometa i komunikacija u vezi sa zamjenom oštećenih informacijskih tabli na cesti M-17 do granice sa Republikom Hrvatskom zbog prefarbavanja natpisa mjesta na ćirilicom pismu.

Drugo pitanje uputio je Federalnom ministarstvu unutrašnjih poslova - šta se poduzelo kako bi se otkrili počinitelji ovog vandalskog čina.

Besim Spahić postavio je dva pitanja i pokrenuo jednu inicijativu.

Prvo pitanje odnosi se na imenovanje direktora BH Telecoma u Zenici, koliko je od 2002. godine primljeno kadra u BH Telecomu u Zenici, njihova imena i prezimena, pozicije na koje su postavljeni i da li su objavljeni konkursi za te pozicije.

Drugo pitanje uputio je Federalnom ministarstvu zdravstva a tiče se vakcina za djecu.

Pokrenuo je inicijativu da se uvede delegatski sat na kojem bi se postavljala delegatska pitanja a ministri na njih bi direktno odgovarali.

Federalni ministar zdravstva Safet Omerović odgovorio je na pitanje u vezi sa vakcinama.

Ramo Isak postavio je pitanje i pokrenuo inicijativu.

Upitao je Vladu Federacije zašto nije osiguran novac za demobilizirane branitelje.

Pokrenuo je inicijativu prema Federalnom ministarstvu unutrašnjih poslova koja se odnosi na opremu i označavanje zaštitara i zaštitarskih vozila.

Federalni ministar finansija Vjekoslav Bevanda odgovorio je na pitanje koje se tiče naknada za demobilizirane branitelje.

Sead Čaušević prokomentirao je odgovore u vezi sa špiljom Vjetrenica i vakcinama za djecu zatraživši pisani odgovor na pitanje koje se tiče nedostatka vakcina.

Miro Lazović pokrenuo je inicijativu da se obavi rasprava na plenarnoj sjednici oba doma Parlamenta Federacije o stanju na Federalnoj televiziji.

Asim Kamber postavio je pitanje u vezi sa otpuštanjem zaposlenika Federalne televizije.

Zijad Tvica postavio je pitanje Federalnom ministarstvu zdravstva a tiče se razlike u cijenama lijekova u Federaciji u odnosu na Republiku Srpsku zatraživši pisani odgovor.

Besim Imamović uputio je pitanje federalnom ministru poljoprivrede, vodoprivrede i šumarstva iznoseći primjedbe na rad tog ministarstva u vezi sa donošenjem Zakona o zaštiti prirode u dijelu koji se odnosi na planinu Konjuh, a koji je u proceduri u Skupštini Tuzlanskog kantona.

Federalni ministar poljoprivrede, vodoprivrede i šumarstva Damir Ljubić odgovorio je na ovo pitanje.

Ivo Komšić upitao je u kojoj su fazi razgovori u vezi sa imenovanjem novog premijera Federacije.

Zoran Budimić postavio je pitanje federalnom ministru poljoprivrede, vodoprivrede i šumarstva - hoće li i kada biti otkupljeni tržišni viškovi u poljoprivrednoj proizvodnji radi formiranja robnih rezervi.

Josip Perić postavio je tri pitanja.

Prvo pitanje uputio je Federalnom ministarstvu pravde i Federalnoj upravi za inspekcijske poslove u vezi sa Zakonom o inspekcijama u Federaciji Bosne i Hercegovine, odnosno šta je urađeno kako bi se ispoštovala presuda Ustavnog suda Federacije kojom je određen rok za otklanjanje nepravilnosti u ovom Zakonu, te da li je rok prošao. Upitao je ko je kriv što se neustavne odredbe nisu uskladile sa Ustavom Federacije.

Drugo pitanje vezano je uz prelazak sjedišta Porezne uprave iz Tomislav-Grada u Livno.

Treće pitanje tiče se mogućnosti da se CIPS-ove iskaznice mogu izdavati u prostorijama policijskih uprava kako bi se osigurala ušteda od 160.000,00 KM.

* * *

Nakon postavljenih delegatskih pitanja i pokrenutih inicijativa prešlo se na utvrđivanje dnevnog reda.

Predsjedavajući je obavijestio delegate da je Vlada Federacije dostavila Prijedlog Zakona o dopunama Zakona o izvršnom postupku i Prijedlog Zakona o dopunama Zakona o državnoj službi u Federaciji Bosne i Hercegovine sa prijedlogom da se razmatraju po hitnom postupku.

Sa 41 glasom za, uz jedan glas protiv i uz jedan uzdržani glas, Dom naroda je prihvatio da se Prijedlog Zakona o dopunama Zakona o izvršnom postupku razmatra po hitnom postupku.

Sa 37 glasova za, uz dva glasa protiv i uz pet uzdržanih glasova, Dom naroda je prihvatio da se Prijedlog Zakona o dopunama Zakona o državnoj službi u Federaciji Bosne i Hercegovine razmatra po hitnom postupku.

Nakon toga federalni ministar pravde Feliks Vidović predložio je da se Prijedlog Zakona o dopunama Zakona o državnoj službi u Federaciji Bosne i Hercegovine skine sa dnevnog reda sjednice i prolongira za narednu sjednicu dok se ne postigne zajednički stav u vezi sa određenim dilemama koje se tiču ovog zakona, što su delegati prihvatili.

Predsjedavajući je potom stavio na glasanje Prijedlog Zakona o osnovnim pravima osoba sa onesposobljenjem koji su predložili Klub zastupnika SDA i Klub zastupnika SBiH u Predstavničkom domu sa prijedlogom da se razmatra po hitnom postupku, te konstatovao da su delegati, sa 40 glasova za i uz četiri uzdržana glasa, prihvatili da se Prijedlog Zakona razmatra po hitnom postupku.

Predsjedavajući je obavijestio delegate da je Vlada Federacije dostavila Prijedlog Zakona o dopunama Zakona o porezu na dobit i Prijedlog Zakona o izmjeni Zakona o leasingu sa prijedlogom da se razmatraju po skraćenom postupku i, na osnovu rezultata glasanja, konstatovao sljedeće:

- sa 45 glasova za, delegati su prihvatili da se Prijedlog Zakona o dopunama Zakona o porezu na dobit razmatra po skraćenom postupku,
- sa 45 glasova za, delegati su prihvatili da se Prijedlog Zakona o izmjeni Zakona o leasingu razmatra po skraćenom postupku.

Sa 45 glasova za, Dom naroda je prihvatio da se Prijedlog Zakona o izmjenama Zakona o federalnim ministarstvima i drugim tijelima federalne uprave, koji je predložio Klub zastupnika HDZ BiH u Predstavničkom domu, razmatra po skraćenom postupku.

Predsjedavajući je obavijestio delegate da je Kolegij Doma naroda predložio da se 19. tačka razmatra kao 1. tačka dnevnog reda a da se 18. tačka dnevnog reda - Informacija o stanju u privredi u Federaciji Bosne i Hercegovine - razmatra kao 2. tačka dnevnog reda.

Predsjednica Kluba delegata srpskog naroda Mira Ljubijankić je u ime Kluba predložila da se tačka - Izbor i imenovanja skine sa dnevnog reda, jer nije zadovoljen princip zastupljenosti spolova, kao ni nacionalna zastupljenost, a posebno kod podtačke koja se odnosi na imenovanje članova Komisije za koncesije Federacije Bosne i Hercegovine.

Predsjedavajući je predložio da u dnevnom redu ostane tačka Izbor i imenovanja pod kojom bi se razmatrao Prijedlog odluke o imenovanju Upravnog odbora Radio-televizije Federacije Bosne i Hercegovine, što su delegata sa 41 glasom za i tri uzdržana glasa prihvatili.

Potom se prešlo na glasanje o dnevnom redu.

Sa 45 glasova za i uz jedan uzdržani glas, usvojen je sljedeći:

DNEVNI RED

1. Izbor i imenovanja;
2. Informacija o stanju u privredi u Federaciji Bosne i Hercegovine:
 - a) Informacija o stanju metalne, elektro i namjenske industrije u Federaciji Bosne i Hercegovine sa analizom uticaja recesije i prijedlogom zaključaka,
 - b) Informacija o „Agrokomercu“ i prijedlog mjera za zaštitu imovine od daljnjeg uništavanja;
3. Prijedlog Zakona o dopunama Zakona o izvršnom postupku – hitni postupak;
4. Prijedlog Zakona o dopunama Zakona o porezu na dobit – skraćeni postupak;
5. Prijedlog Zakona o izmjeni Zakona o leasingu – skraćeni postupak;
6. Prijedlog Zakona o izmjenama i dopunama Zakona o prostornom planiranju i korištenju zemljišta na nivou Federacije Bosne i Hercegovine;
7. Prijedlog Zakona o jedinstvenom sistemu registracije, kontrole i naplate doprinosa;
8. Prijedlog Zakona o izmjenama Zakona o federalnim ministarstvima i drugim tijelima federalne uprave (predlagač: Klub zastupnika HDZBiH u Predstavničkom domu) – skraćeni postupak;
9. Prijedlog Zakona o rudarstvu Federacije Bosne i Hercegovine;
10. Prijedlog Zakona o geološkim istraživanjima Federacije Bosne i Hercegovine;
11. Prijedlog Zakona o osnovnim pravima osoba sa onesposobljenjem (predlagač: Klub zastupnika SDA i Klub zastupnika SBiH u Predstavničkom domu) – hitni postupak;
12. Prijedlog Zakona o zaštiti od požara i vatrogastvu;
13. Nacrt Zakona o zdravstvenoj zaštiti;
14. Nacrt Zakona o građevinskim proizvodima;
15. Nacrt Zakona o izmjenama i dopunama Zakona o upravljanju otpadom;
16. Prijedlog Programa rada Doma naroda Parlamenta Federacije Bosne i Hercegovine za 2009. godinu;
17. Strategija zapošljavanja u Federaciji Bosne i Hercegovine (2009.-2013.) sa zaključcima Vlade Federacije Bosne i Hercegovine;

18. Izvještaj o radu Zavoda zdravstvenog osiguranja i reosiguranja Federacije Bosne i Hercegovine u 2008. godini i Prijedlog Programa rada za 2009. godinu.

1. Izbor i imenovanja

Prijedlog Odluke o imenovanju Upravnog odbora Radio-televizije Federacije Bosne i Hercegovine

Na osnovu člana 65. Zakona o javnom servisu Radio-televizije Bosne i Hercegovine, na prijedlog Vlade Federacije, Parlament Federacije donosi Odluku o imenovanju Upravnog odbora Radio-televizije Federacije Bosne i Hercegovine.

Komisija za izbor i imenovanja pripremila je Prijedlog Odluke o imenovanju Upravnog odbora Radio-televizije Federacije Bosne i Hercegovine. Predloženi su sljedeći članovi:

- **Kadrija Hodžić** iz reda Bošnjaka na period od jedne godine,
- **Igor Soldo** iz reda Hrvata na period od tri godine,
- **Radenko Udovičić** iz reda Srba na period od dvije godine i
- **Goran Samardžić** iz reda ostalih na period od četiri godine.

Ispred Komisije za izbor i imenovanja govorio je predstavnik Komisije Željko Asić.

U raspravi su učestvovali: Muharem Serbezovski, Igor Rajner, Željko Asić, Besim Imamović, Saša Magazinović, Snježana Milavić, Nikola Simić, Asim Kamber, Lidija Bradara, Mirsad Pindžo, Besim Spahić i Svetozar Pudarić.

Potom se prešlo na glasanje o Prijedlogu Odluke.

Sa 33 glasa za, uz 10 uzdržanih glasova i uz jedan glas protiv, Dom naroda donio je Odluku o imenovanju Upravnog odbora Radio-televizije Federacije Bosne i Hercegovine: Za članove su imenovani: **Kadrija Hodžić** iz reda Bošnjaka na period od jedne godine, **Igor Soldo** iz reda Hrvata na period od tri godine, **Radenko Udovičić** iz reda Srba na period od dvije godine i **Goran Samardžić** iz reda ostalih na period od četiri godine.

2. Informacija o stanju u privredi u Federaciji Bosne i Hercegovine:

a) Informacija o stanju metalne, elektro i namjenske industrije u Federaciji Bosne i Hercegovine sa analizom uticaja recesije i prijedlogom zaključaka

Informaciju je utvrdila Vlada Federacije i dostavila Parlamentu Federacije radi informiranja.

Predstavnički dom je na nastavku 20. vanredne sjednice od 21.04.2009. godine razmatrao Informaciju i usvojio zaključke.

Informaciju su razmatrala nadležna radna tijela i dostavila izvještaje.

Ispred Sindikata metalaca Bosne i Hercegovine delegatima se obratio predsjednik Sindikata Ismet Bajramović.

Potom je Izmir Hadživdić, sekretar Doma naroda, pročitao Prijedlog Zaključaka Doma naroda koji su identični zaključcima Predstavničkog doma.

ZAKLJUČCI

1. Zadužuje se Vlada Federacije Bosne i Hercegovine da izvrši povezivanje radnog staža za privredna društva sa većinskim državnim kapitalom u kojima ovlaštenja na osnovu državnog kapitala vrši Vlada Federacije Bosne i Hercegovine. Za povezivanje staža ostalih zaposlenika Vlada Federacije Bosne i Hercegovine će u roku od 60 dana predložiti realna i moguća rješenja koja će očuvati stabilnost fonda PIO.
2. Zadužuje se Vlada Federacije Bosne i Hercegovine da smanji rashod u javnoj upravi i u javnom sektoru i bez odlaganja pokrene investicijske aktivnosti kako bi se održala i povećala zaposlenost u realnom sektoru i osigurao plasman robe i usluga domaćeg sektora (izgradnja elektroenergetskog sistema koja podrazumijeva prestrukturiranje i moderniziranje rudnika ugljena i drugih rudnika u Federaciji u cilju zadovoljenja dinamike, kvantitativnih, finansijskih, socijalnih i drugih neophodnih preduvjeta navedene reforme, te izgradnju novih elektroenergetskih objekata; reformu naftnog sektora koja uključuje rekonstrukciju i stavljanje u funkciju terminalskih kapaciteta u cilju osiguranja devedesetodnevni obaveznih zaliha naftnih derivata, infrastrukturne, cestovne i druge projekte, komunikacijske projekte, projekte iz poljoprivrede itd.).
Rok za izvršenje aktivnosti je hitan i stalan.
3. Zadužuje se Vlada Federacije Bosne i Hercegovine da putem Programa rada Razvojne banke Federacije Bosne i Hercegovine za 2009. godinu osigura značajniji iznos sredstava koja će se koristiti za poticanje odgovarajućih razvojnih projekata i za poticaj izvozno-orijentiranim privrednim subjektima uz najpovoljniju kamatnu stopu. Dati prioritete izvoznim društvima i društvima namjenske industrije. Potrebno je osigurati da privredna društva koja većinski izvoze a uzela su kredite kod drugih komercijalnih banaka sa nepovoljnijom kamatnom stopom mogu podići kredit kod Razvojne banke Federacije Bosne i Hercegovine sa ciljem prekida – isplate nepovoljnijeg kredita.
Rok za realizaciju je 60 dana.
4. Raditi na rasterećenju privrede te do polovine 2010. godine značajnije smanjiti davanja privrednim društvima. Ove aktivnosti potrebno je početi

odmah kako bi se pripremila zakonska regulativa i stupila u primjenu 01. srpnja 2010. godine.

5. Zadužuje se Vlada Federacije Bosne i Hercegovine da provede sve potrebne aktivnosti kako bi Parlament Federacije Bosne i Hercegovine mogao usvojiti Zakon o električnoj energiji ili neki drugi akt prema kojem će Vlada Federacije Bosne i Hercegovine imati mogućnost koordinacije i učestvovanja u formiranju cijene električne energije sa ciljem pomoći izvozno-orijentiranim i drugim privrednim društvima. Potrebno je zakonski regulirati da se prvo električnom energijom podmire korisnici u Federaciji, a tek tada se može vršiti izvoz električne energije.
Rok za realiziranje je 90 dana.
6. Zadužuje se Vlada Federacije Bosne i Hercegovine da nađe način da Vijeće ministara Bosne i Hercegovine pokrene i dovede do kraja aktivnosti kako bi se osigurao nastavak primjene preferencijalnog tretmana domaćeg od 10% za period 2009.-2011. godina.
Rok za realizaciju je 60 dana.
7. Postojeće i nastale tužbe radnika rješavati u direktnom sporazumu sa radnicima i sindikatom, posebno za svaki slučaj pojedinog privrednog subjekta vodeći računa da ne dođe do blokade poslovanja privrednog društva sa ciljem očuvanja radnih mjesta i poslovanja.
8. Zadužuje se Vlada Federacije Bosne i Hercegovine da hitno pripremi i u Parlament Federacije Bosne i Hercegovine dostavi na usvajanje: Zakon o reviziji privatizacije državnog kapitala u privrednim društvima i bankama, Izmjene i dopune Zakona o štrajku, Zakon o zaštiti na radu, Zakon o radu i Zakon o privatizacijskim investicijskim fondovima.
Dom naroda Parlamenta Federacije Bosne i Hercegovine poduzet će sve aktivnosti da se ovi zakoni usvoje u Parlamentu Federacije Bosne i Hercegovine.
Rok za realizaciju je 60 dana.
9. Dom naroda Parlamenta Federacije Bosne i Hercegovine nalaže Vladi Federacije Bosne i Hercegovine da se okonča proces privatizacije privrednog društva „Aluminij“ d.d. Mostar u skladu sa postojećim Sporazumom.
Rok za realizaciju je 30 dana.
10. Zbog nastale situacije u vezi sa recesijom (otpuštanje radnika, slanje radnika na čekanje, smanjenje plaća itd.) predlaže se Vladi Federacije sagledavanje mogućnosti preispitivanja kolektivnih ugovora o pravima i obavezama poslodavaca i zaposlenika u dijelu plaća i naknada plaća u svim oblastima. Sagledati mogućnost skraćanja radne sedmice kada je to alternativa otpuštanju radnika.
Rok za realizaciju je 60 dana.
11. Zadužuje se Vlada Federacije Bosne i Hercegovine da usvoji kratkoročne i srednjoročne mjere razvoja namjenske industrije u Federaciji kako bi se ova grana osposobila za profitabilno poslovanje.

12. Parlament Federacije Bosne i Hercegovine zadužuje Vladu Federacije Bosne i Hercegovine da primjeni konkretne metode i mjere za eliminiranje svih oblika sive ekonomije i korupcije u Federaciji.
13. Parlament Federacije Bosne i Hercegovine permanentno će pratiti provedbu svih zaključaka te u funkciji njihove provedbe donositi provedbene propise za eliminiranje posljedica recesije – ekonomske krize.

U raspravi su učestvovali: Elvira Abdić-Jelenović, Hasan Tafro, Igor Rajner, Besim Spahić, Josip Perić, predsjednik Kluba delegata hrvatskog naroda, Mislav Sučić, Besim Imamović, Sead Čaušević, Muhamed Osmić, Ramo Isak, Zoran Budimić, Ivo Komšić, Lidija Bradara i Ismet Bajramović, predsjednik Sindikata metalaca Bosne i Hercegovine.

Prešlo se na glasanje.

Sa 34 glasa za i uz dva uzdržana glasa, Dom naroda Parlamenta Federacije Bosne i Hercegovine **primio je na znanje** Informaciju o stanju metalne, elektro i namjenske industrije u Federaciji Bosne i Hercegovine sa analizom uticaja recesije i usvojio predložene Zaključke.

b) Informacija o „Agrokomercu“ i prijedlog mjera za zaštitu imovine od daljnjeg uništavanja

Informaciju Domu naroda dostavila je i obrazložila Elvira Abdić-Jelenović te predložila Zaključke koje je pročitala.

Informaciju i prijedlog mjera razmatrala su nadležna radna tijela i dostavila izvještaje.

U raspravi su učestvovali: Elvira Abdić-Jelenović, Mislav Sučić, Kenan Keserović, Mirvet Beganović, ispred načelnika Općine Velika Kladuša i kao dioničar „Agrokomerca“, Zoran Budimić, Besim Spahić i Besim Imamović.

Federalni ministar poljoprivrede, vodoprivrede i šumarstva Damir Ljubić je pročitao Zaključak Odbora za privredu i predložio da se uvrsti u Zaključke Elvire Abdić-Jelenović a da četvrti Zaključak, koji se odnosi na uvezivanje staža, postane sastavni dio Informacije, što su delegati prihvatili.

Nakon rasprave, predsjedavajući je konstatovao da je Dom naroda, sa 38 glasova za, primio na znanje Informaciju o „Agrokomercu“ i prijedlog mjera za zaštitu imovine od daljnjeg uništavanja.

Dom naroda usvojio je i sljedeće:

ZAKLJUČKE

1. Dom naroda Parlamenta Federacije Bosne i Hercegovine traži od svih institucija da zaustavi sve radnje i aktivnosti vezane uz imovinu "Agrokomerca" u Bosni i Hercegovini i inozemstvu.
2. Zadužuje se Federalno tužiteljstvo da istraži i procesuiru sve učesnike u kriminalu i pljački „Agrokomerca“ od 1995. godine do danas.
3. Traži se od domaćih sudova da se izjasne o zahtjevu za privremenu mjeru koju su u službenom zahtjevu tražili dioničari "Agrokomerca", tj. udruženje nezaposlenih dioničara.
4. Zadužuje se Vlada Federacije Bosne i Hercegovine da hitno poduzme sve mjere u pogledu dokazivanja zloupotrebe položaja imenovanih direktora koji su zadužili preduzeće bez saglasnosti Nadzornog odbora i kao neovlašteni dali saglasnost na upis hipoteka.
5. Zadužuje se Vlada Federacije Bosne i Hercegovine da pripremi i dostavi Parlamentu Federacije Bosne i Hercegovine informaciju o svim poduzetim radnjama u „Agrokomercu“ d.d. Velika Kladaša od 1995. godine do danas kako bi se detaljnije moglo analizirati i sagledati postojeće stanje u „Agrokomercu“, te predložiti konkretne mjere za prevazilaženje postojećeg stanja.

3. Prijedlog Zakona o dopunama Zakona o izvršnom postupku

Prijedlog Zakona utvrdila je Vlada Federacije

Predstavnički dom je na 22. sjednici od 05.05.2009. godine usvojio Prijedlog Zakona o dopunama Zakona o izvršnom postupku uz tehničku korekciju koju je ministar prihvatio i uz ispravke tehničkih pogrešaka koje je ministar naveo na sjednici Predstavničkog doma.

Prijedlog Zakona razmatrala su nadležna radna tijela i dostavila izvještaje.

Prijedlog Zakona obrazložio je Feliks Vidović, federalni ministar pravde.

U raspravi su učestvovali: Mirsad Pindžo, Besim Imamović, Ljubo Zovko, Iva Tadić, Josip Perić, predsjednik Kluba delegata hrvatskog naroda, Igor Rajner, Muhamed Osmić i Feliks Vidović, federalni ministar pravde.

Igor Rajner podnio je amandman koji se odnosi na brisanje člana 3. kao i Mirsad Pindžo, što federalni ministar pravde Feliks Vidović nije prihvatio.

S obzirom na to da podnosioci amandmana nisu odustali od njih, predsjedavajući je stavio na glasanje i konstatovao da Amandman **nije**

dobio potreban broj glasova jer je za glasalo 20 delegata, a 20 delegata je bilo uzdržano.

Potom se prešlo na glasanje o Prijedlogu Zakona o dopunama Zakona o izvršnom postupku.

Na osnovu rezultata poimeničnog glasanja koje je obavio Izmir Hadživadić, sekretar Doma naroda, predsjedavajući je konstatovao da je Dom naroda Parlamenta Federacije Bosne i Hercegovine, sa 30 glasova za, uz dva glasa protiv i uz 12 uzdržanih glasova, usvojio Prijedlog Zakona o dopunama Zakona o izvršnom postupku.

Potom je federalni ministar finansija Vjekoslav Bevanda predložio da se pređe na tač. 4., 5. i 7. zbog njihove važnosti i hitnosti, što su delegati prihvatili.

- 4. Prijedlog Zakona o dopunama Zakona o porezu na dobit**
- 5. Prijedlog Zakona o izmjeni Zakona o leasingu**
- 7. Prijedlog Zakona o jedinstvenom sistemu registracije, kontrole i naplate doprinosa**

Prijedloge zakona utvrdila je Vlada Federacije.

Predstavnički dom je na 22. sjednici od 05.05.2009. godine usvojio Prijedlog Zakona o dopunama Zakona o porezu na dobit u tekstu kako ga je predložila Vlada Federacije.

Predstavnički dom je na 22. sjednici od 05.05.2009. godine usvojio Prijedlog Zakona o izmjeni Zakona o leasingu u tekstu kako ga je predložila Vlada Federacije.

Predstavnički dom je na nastavku 21. sjednice od 07.04.2009. godine usvojio Prijedlog Zakona o jedinstvenom sistemu registracije, kontrole i naplate doprinosa u tekstu kako ga je predložila Vlada Federacije.

Prijedloge zakona razmatrala su nadležna radna tijela i dostavila izvještaje.

Prijedloge zakona obrazložio je federalni ministar finansija Vjekoslav Bevanda.

U raspravi su učestvovali: Igor Rajner, Svetozar Pudarić, federalni ministar finansija Vjekoslav Bevanda i Ramo Isak.

4. Prijedlog Zakona o dopunama Zakona o porezu na dobit

Sa 38 glasova za, Dom naroda usvojio je Prijedlog Zakona o dopunama Zakona o porezu na dobit.

5. Prijedlog Zakona o izmjeni Zakona o leasingu

Sa 38 glasova za, Dom naroda Parlamenta Federacije Bosne i Hercegovine usvojio je Prijedlog Zakona o izmjeni Zakona o leasingu.

7. Prijedlog Zakona o jedinstvenom sistemu registracije, kontrole i naplate doprinosa

Sa 38 glasova za i uz jedan uzdržani glas, Dom naroda Parlamenta Federacije Bosne i Hercegovine usvojio je Prijedlog Zakona o jedinstvenom sistemu registracije, kontrole i naplate doprinosa.

Predsjedavajući je prekinuo rad sjednice u 16.48.

* * *

NASTAVAK SJEDNICE OD 09. JULA 2009. GODINE

Sjednica je počela u 10.30.

Sjednici je predsjedavao Stjepan Krešić, predsjedavajući Doma naroda Parlamenta Federacije Bosne i Hercegovine.

Na početku sjednice predsjedavajući je pozdravio: delegate, potpredsjednicu Federacije Spomenku Mičić, premijera Federacije Mustafu Mujezinovića, zamjenika premijera Gavrila Grahovca, ministre u Vladi Federacije Bosne i Hercegovine, predstavnike udruženja, sindikata, međunarodnih organizacija, goste i predstavnike akreditiranih medijskih kuća koji prate rad sjednice.

Izostanak sa sjednice opravdao je Jasenko Tufekčić.

Na osnovu evidencije Stručne službe, predsjedavajući je konstatovao da sjednici prisustvuje 46 delegata, što čini većinu, te Dom naroda može raditi i punovažno odlučivati.

Prije prelaska na rad predsjedavajući Doma naroda čestitao je Mustafi Mujezinoviću na imenovanju za premijera Federacije i pozvao ga da se obrati Domu, što je on i učinio.

Nakon toga predsjedavajući je podsjetio delegate na preostale tačke dnevnog reda. Također, obavijestio je delegate da će se poslije ove održati i varedna sjednica na kojoj će se razmatrat Nacrt Zakona o fiskalnim sistemima. Razlog za ovu sjednicu je što prihvatanje Nacrta Zakona predstavlja uvjet za uspješno realiziranje aranžmana sa Međunarodnim monetarnim fondom.

6. Prijedlog Zakona o izmjenama i dopunama Zakona o prostornom planiranju i korištenju zemljišta na nivou Federacije Bosne i Hercegovine

Prijedlog Zakona utvrdila je Vlada Federacije.

Predstavnički dom je na 22. sjednici od 05.05.2009. godine usvojio Prijedlog Zakona o izmjenama i dopunama Zakona o prostornom planiranju i korištenju zemljišta na nivou Federacije Bosne i Hercegovine sa tri amandmana Vlada Federacije i jednim amandmanom koji je Vlada Federacije prihvatila na sjednici Predstavničkog doma, pa su postali sastavni dio Prijedloga Zakona.

Amandmani Vlade odnose se na čl. 19., 29. i 111. a amandman koji je Vlada Federacije prihvatila odnosi se na uvođenje novog člana 42.

Na Prijedlog Zakona amandman je podnio Igor Rajner, a odnosi se na član 11. stav 2.

Predsjedavajući je izjavio da je amandman upućen Vladi Federacije na mišljenje iako nije dostavljen u poslovničkom roku, tj. tri dana prije sjednice.

Prijedlog Zakona razmatrala su nadležna radna tijela i dostavila svoje izvještaje.

Prijedlog Zakona obrazložio je Salko Obhodaš, federalni ministar prostornog uređenja, i izjavio da će prihvatiti amandman ukoliko podnosilac insistira na njemu.

U raspravi je učestvovao Igor Rajner izjavivši da ostaje pri amandmanu.

Nakon rasprave predsjedavajući je stavio amandman na glasanje.

Na osnovu rezultata glasanja, predsjedavajući je konstatovao da je Dom naroda Parlamenta Federacije Bosne i Hercegovine, sa 43 glasa za i uz četiri uzdržana glasa, usvojio Amandman.

Amandman glasi:

U članu 11. u stavu 2. riječ "četiri" zamjenjuje se riječju "dvije".

Potom se prešlo na glasanje o Prijedlogu Zakona.

Na osnovu rezultata glasanja, predsjedavajući je konstatovao da je Dom naroda Parlamenta Federacije Bosne i Hercegovine, sa 44 glasa za i uz tri uzdržana glasa, usvojio Prijedlog Zakona o izmjenama i dopunama Zakona o prostornom planiranju i korištenju zemljišta na nivou Federacije Bosne i Hercegovine.

Budući da je Prijedlog Zakona usvojen u različitom tekstu u oba doma Parlamenta Federacije **potrebno ga je usaglasiti.**

8. Prijedlog Zakona o izmjenama Zakona o federalnim ministarstvima i drugim organima federalne uprave

Prijedlog Zakona predložio je Klub zastupnika HDZ BiH u Predstavničkom domu.

Vlada Federacije dostavila je Mišljenje u vezi sa Prijedlogom Zakona te podržava donošenje Zakona.

Predstavnički dom je na nastavu 21. sjednice od 21.04.2009. godine usvojio Prijedlog Zakona sa amandmanom predlagača, koji je postao sastavni dio Prijedloga Zakona. Amandman se odnosi na član 6.

Prijedlog Zakona razmatrala su nadležna radna tijela i dostavila svoje izvještaje.

U raspravi nije niko učestvovao.

Na osnovu rezultata glasanja, predsjedavajući je konstatovao da je Dom naroda Parlamenta Federacije Bosne i Hercegovine jednoglasno (47 glasova) usvojio Prijedlog Zakona o izmjenama Zakona o federalnim ministarstvima i drugim organima federalne uprave.

9. Prijedlog Zakona o rudarstvu Federacije Bosne i Hercegovine

Prijedlog Zakona utvrdila je Vlada Federacije.

Predstavnički dom je na nastavu 21. sjednice od 21.04.2009. godine usvojio Prijedlog Zakona sa sedam amandmana koje je Vlada prihvatila pa su postali sastavni dio Prijedloga Zakona.

Na Prijedlog Zakona devet amandmana zajednički su podnijeli Lidija Bradara i Radoje Vidović. Amandmani se odnose na član 7. st. 2. i 3.; član 11. stav 2.; član 13.; član 14. st. 3. i 4.; član 16. stav 1.; član 19.; član 21.; član 37. st. 2. i 3. i član 91.

Amandmani su dostavljeni Vladi Federacije radi davanja Mišljenja.

Igor Rajner je također podnio devet amandmana i to: na član 2., član 3., član 13. stav 2., član 26., čl. 39. i 40., član 43., na Glavu IV., član 59. st. 4. i 7. i član 110.

Iako amandmani nisu dostavljeni u poslovničkom roku, tj. tri dana prije sjednice, amandmani su dostavljeni Vladi Federacije radi davanja mišljenja.

Prijedlog Zakona razmatrala su nadležna radna tijela i dostavila svoje izvještaje.

Prijedlog Zakona obrazložio je Sakib Slijepčević, pomoćnik federalnog ministra energije, rudarstva i industrije, i predložio da se odmah obrazlože tač. 9. i 10. I u vezi s njima obavi zajednička rasprava što su delegati prihvatili.

U raspravi su učestvovali: Josip Perić, predsjednik Kluba delegata hrvatskog naroda, Igor Rajner, Radoje Vidović i Svetozar Pudarić.

S obzirom na to da je Josip Perić, predsjednik Kluba delegata hrvatskog naroda, u raspravi predložio donošenje zaključka, predsjedavajući ga je stavio na glasanje i konstatovao da je Dom naroda

Parlamenta Federacije Bosne i Hercegovine, sa 37 glasova za i uz četiri uzdržana glasa, usvojio sljedeći:

ZAKLJUČAK

1. Zadužuje se Vlada Federacije Bosne i Hercegovine da o Prijedlogu Zakona o rudarstvu Federacije Bosne i Hercegovine provede dodatne dogovore sa zakonodavnim organima kantona koji su dužni da se do 15.09.2009. godine izjasne o predloženoj podjeli nadležnosti između federalnih i kantonalnih vlasti.
2. Za kantone koji se u zadanom roku ne izjasne Dom naroda će smatrati da su saglasni sa predloženom podjelom razgraničenja nadležnosti u vezi sa Prijedlogom Zakona.

Predsjedavajući je podsjetio delegate da rasprava o Prijedlogu Zakona nije zaključena.

10. Prijedlog Zakona o geološkim istraživanjima u Federaciji Bosne i Hercegovine

Prijedlog Zakona utvrdila je Vlada Federacije.

Predstavnički dom je na nastavu 21. sjednice od 21.04.2009. godine usvojio Prijedlog Zakona sa dva amandmana koje je Vlada prihvatila pa su postali sastavni dio Prijedloga Zakona.

Na Prijedlog Zakona amandman je podnijela Elvira Abdić-Jelenović.

Iako amandman nije dostavljen u poslovničkom roku, tj. tri dana prije sjednice amandman je dostavljen Vladi Federacije radi davanja mišljenja.

Amandman se odnosi na član 42.

Prijedlog Zakona razmatrala su nadležna radna tijela i dostavila svoje izvještaje.

Predsjedavajući je predložio da se i u vezi sa Prijedlogom Zakona donese istovjetan zaključak koji je usvojen prilikom razmatranja 9. tačke i konstatovao da je Dom naroda Parlamenta Federacije Bosne i Hercegovine, sa 37 glasova za i uz tri uzdržana glasa, usvojio sljedeći:

ZAKLJUČAK

1. Zadužuje se Vlada Federacije Bosne i Hercegovine da o Prijedlogu Zakona o geološkim istraživanjima u Federaciji Bosne i Hercegovine provede dodatne dogovore sa zakonodavnim organima kantona koji su dužni da se do 15.09.2009. godine izjasne o predloženoj podjeli nadležnosti između federalnih i kantonalnih vlasti.
2. Za kantone koji se u zadanom roku ne izjasne Dom naroda će smatrati da su saglasni sa predloženom podjelom razgraničenja nadležnosti u vezi sa Prijedlogom Zakona.

Predsjedavajući je podsjetio delegate da rasprava o Prijedlogu Zakona nije zaključena.

11. Prijedlog Zakona o osnovnim pravima lica sa onesposobljenjem

Predlagači ovog Zakona su Klub zastupnika SDA i Klub zastupnika SBiH u Predstavničkom domu.

Predstavnički dom je na 19. varednoj sjednici od 24.02.2009. godine usvojio Prijedlog Zakona sa dva amandmana koje su predlagači prihvatili pa su postali sastavni dio Prijedloga Zakona. Amandmani se odnose na član 10. i dodavanje novog člana 24.

Vlada Federacije dostavila je Mišljenje kojim ne podržava Prijedlog Zakona.

Naknadno je Vlada kao dopunu Mišljenja dostavila Informaciju Federalnog ministarstva rada i socijalne politike o implementaciji Zakona o osnovama socijalne zaštite, zaštite civilnih žrtava rata i zaštite porodice sa djecom - Izveštaj za period 12.03.2009. godine – 12.06.2009. godine.

Prijedlog Zakona razmatrala su nadležna radna tijela i dostavila svoje izvještaje.

Prijedlog Zakona obrazložio je Ibrahim Nadarević, predsjednik Kluba zastupnika SDA u Predstavničkom domu.

Ispred Vlade Federacije govorio je Perica Jelečević, federalni ministar rada i socijalne politike, i istakao da će Ministarstvo u roku od tri mjeseca izraditi i u proceduru poslati sljedeći paket prijedloga zakona: Zakon o pravima porodice sa djecom, Zakon o osnovama socijalne zaštite, Zakon o pravima civilnih žrtava rata i Zakon o osnovnim pravima lica sa invaliditetom.

U raspravi su učestvovali: Elvira Abdić-Jelenović, Mira Ljubijankić, Svetozar Pudarić, Josip Perić, predsjednik Kluba delegata hrvatskog naroda, Tomo Vidović, Mislav Sučić, Ibrahim Nadarević i Igor Rajner.

Nakon rasprave, predsjedavajući je konstatovao da je Dom naroda Parlamenta Federacije Bosne i Hercegovine, sa 32 glasa za, uz dva glasa protiv i uz šest uzdržanih glasova, usvojio sljedeći:

Z A K L J U Č A K

1. Odgađa se izjašnjenje o Prijedlogu Zakona o osnovnim pravima lica sa onesposobljenjem čiji su predlagači Klub zastupnika SDA i Klub zastupnika SBiH u Predstavničkom domu do 01.10.2009. godine.
2. Zadužuje se Vlada Federacije da do navedenog roka u parlamentarnu proceduru dostavi set zakona iz oblasti socijalne zaštite.

12. Prijedlog Zakona o zaštiti od požara i vatrogastvu

Prijedlog Zakona utvrdila je Vlada Federacije.

Predstavnički dom je na nastavku 17. sjednice od 29.10.2008. godine usvojio Prijedlog Zakona sa tri amandmana koje je Vlada Federacije prihvatila pa su postali sastavni dio Prijedloga Zakona.

Naknadno je Vlada Federacije dostavila dva amandmana koji su postali sastavni dio Prijedloga Zakona. Amandmani se odnose na čl. 67. i 137.

Na Prijedlog Zakona amandman je podnijela Lidija Bradara.

Amandman se odnosi na član 137.

Amandman je dostavljen Vladi Federacije radi davanja Mišljenja.

Predsjedavajući je podsjetio delegate da je Dom naroda na 18. sjednici od 22.01.2009. godine zaključio raspravu o Prijedlogu Zakona i na prijedlog premijera odgodio izjašnjenje dok se o njemu ne izjasni Ekonomsko-socijalno vijeće Federacije Bosne i Hercegovine.

Naknadno je Ekonomsko-socijalno vijeće dostavilo Zaključak kojim ne prihvata Amandman II. Vlade Federacije koji se odnosi na član 137. stav 2.

Ispred predlagača govorio je Alija Tihić, direktor Federalne uprave civilne zaštite, i izjavio da ne prihvata Amandman Lidije Bradare.

Amandmani Vlade Federacije glase:

Amandman I.

U članu 67. u stavu 2. u drugom redu iza riječi "prijevoz" dodaju se riječi: "i gašenje požara na području".

Amandman II.

U članu 137. stav 2. se briše.

Na osnovu rezultata glasanja, predsjedavajući je konstatovao da je Dom naroda Parlamenta Federacije Bosne i Hercegovine jednoglasno (33 glasa) usvojio Prijedlog Zakona o zaštiti od požara i vatrogastvu.

Prema tome, Prijedlog Zakona usvojen je u različitom tekstu u oba doma Parlamenta Federacije i **potrebno ga je usaglasiti.**

13. Nacrt Zakona o zdravstvenoj zaštiti

Nacrt Zakona utvrdila je Vlada Federacije.

Predstavnički dom je na 22. sjednici od 05.05.2009. godine razmatrao Nacrt Zakona i Zaključkom ga prihvatio.

Nacrt Zakona razmatrala su nadležna radna tijela i dostavila svoje izvještaje.

Nacrt Zakona obrazložio je Safet Omerović, federalni ministar zdravstva.

U raspravi su učestvovali: Besim Imamović, Lidija Bradara, Zoran Budimić, Mira Ljubijankić, Snježana Milavić, Josip Perić, Dragomir Bilić,

Muhamed Osmić, Emir Frašto i Safet Omerović, federalni ministar zdravlja.

Na osnovu rezultata glasanja, predsjedavajući je konstatovao da je Dom naroda Parlamenta Federacije Bosne i Hercegovine jednoglasno (38 glasa) usvojio sljedeći:

ZAKLJUČAK

1. Dom naroda Parlamenta Federacije Bosne i Hercegovine prihvata Nacrt Zakona o zdravstvenoj zaštiti i smatra da može poslužiti kao osnov za izradu prijedloga Zakona.
2. Zadužuje se Odbor za boračka i invalidska pitanja, rad, zdravstvenu i socijalnu zaštitu da zajedno sa Odborom za zdravlje Predstavničkog doma organizira i vodi javnu raspravu o Nacrtu Zakona u roku koji odrede ovi odbori.
3. Zadužuje se Vlada Federacije da prilikom izrade Prijedloga Zakona ima u vidu prijedloge, primjedbe i sugestije iznesene na sjednici i u javnoj raspravi.

14. Nacrt Zakona o građevinskim proizvodima

Nacrt Zakona utvrdila je Vlada Federacije.

Predstavnički dom je na 22. sjednici od 05.05.2009. godine razmatrao Nacrt Zakona i Zaključkom ga prihvatio.

Nacrt Zakona razmatrala su nadležna radna tijela i dostavila svoje izvještaje.

Nacrt Zakona obrazložio je Hamid Suljović, predstavnik Federalnog ministarstva prostornog uređenja.

Ispred Odbora za prostorno uređenje, ekologiju i stambeno-komunalne poslove govorila je Elvira Abdić-Jelenović, predsjednica Odbora.

U raspravi su učestvovali Elvira Abdić-Jelenović i Igor Rajner.

Na osnovu rezultata glasanja, predsjedavajući je konstatovao da je Dom naroda Parlamenta Federacije Bosne i Hercegovine, sa 34 glasa za i uz dva uzdržana glasa, usvojio sljedeći:

ZAKLJUČAK

1. Dom naroda Parlamenta Federacije Bosne i Hercegovine prihvata Nacrt Zakona o građevinskim proizvodima i smatra da može poslužiti kao osnov za izradu prijedloga Zakona.
2. Zadužuje se Vlada Federacije da prilikom izrade prijedloga Zakona ima u vidu prijedloge, primjedbe i sugestije iznesene na sjednici.

15. Nacrt Zakona o izmjenama i dopunama Zakona o upravljanju otpadom

Nacrt Zakona utvrdila je Vlada Federacije.

Predstavnički dom je na nastavku 22. sjednice od 06.05.2009. godine razmatrao Nacrt Zakona i Zaključkom ga prihvatio.

Nacrt Zakona razmatrala su nadležna radna tijela i dostavila svoje izvještaje.

Nacrt Zakona obrazložila je Kasema Ćatović, sekretarica Federalnog ministarstva okoliša i turizma.

U raspravi nije niko učestvovao.

Na osnovu rezultata glasanja, predsjedavajući je konstatovao da je Dom naroda Parlamenta Federacije Bosne i Hercegovine jednoglasno (34 glasa) usvojio sljedeći:

ZAKLJUČAK

Dom naroda Parlamenta Federacije Bosne i Hercegovine prihvata Nacrt Zakona o izmjenama i dopunama Zakona o upravljanju otpadom i smatra da može poslužiti kao osnov za izradu prijedloga Zakona.

16. Prijedlog Programa rada Doma naroda Parlamenta Federacije Bosne i Hercegovine za 2009. godinu

Prijedlog Programa rada utvrdio je Kolegij Doma naroda.

U raspravi su učestvovali: Tomo Vidović, Igor Rajner, Svetozar Pudarić i Radoje Vidović.

Na osnovu rezultata glasanja, predsjedavajući je konstatovao da je Dom naroda Parlamenta Federacije Bosne i Hercegovine jednoglasno (39 glasova) donio Prijedlog Programa rada Doma naroda Parlamenta Federacije Bosne i Hercegovine za 2009. godinu, uz primjedbe iznesene na sjednici koje je dao Tomo Vidović.

Predsjedavajući je podsjetio delegate da je Program rada otvoren za dopunu tokom godine.

Također na prijedlog Svetozara Pudarića predsjedavajući je konstatovao da će se jedna od sjednica Doma naroda održati u Mostaru.

17. Strategija zapošljavanja u Federaciji Bosne i Hercegovine (2009.-2013.) sa zaključcima Vlade Federacije Bosne i Hercegovine

Strategiju je utvrdila Vlada Federacije i dostavila Parlamentu Federacije radi razmatranja i usvajanja.

Predstavnički dom je na nastavku 21. sjednice od 21.04.2009. godine usvojio Strategiju zapošljavanja u Federaciji Bosne i Hercegovine (2009.-2013.) sa zaključcima Vlade Federacije Bosne i Hercegovine.

Strategiju su razmatrala nadležna radna tijela i dostavila svoje izvještaje.

Strategiju je obrazložila Jasmina Hercegovac, predstavница Federalnog ministarstva rada i socijalne politike.

U raspravi su učestvovali: Besim Imamović, Svetozar Pudarić, Bojan Bošnjak, Kenan Keserović, Edina Papo, Muhamed Osmić, Nikola Simić, Besim Spahić, Igor Rajner i Alija Begović, predsjednik Kluba delegata bošnjačkog naroda.

Na osnovu rezultata glasanja, predsjedavajući je konstatovao da je Dom naroda Parlamenta Federacije Bosne i Hercegovine jednoglasno (37 glasova) odlučio **da predlagaču vrati ovaj materijal na doradu** i da prilikom izrade novog teksta Strategije ima u vidu prijedloge, primjedbe i sugestije iznesene na sjednici Doma naroda.

18. Izvještaj o radu Zavoda zdravstvenog osiguranja i reosiguranja Federacije Bosne i Hercegovine u 2008. godini i Prijedlog Programa rada za 2009. godinu

Izvještaj o radu Zavoda zdravstvenog osiguranja i reosiguranja Federacije Bosne i Hercegovine u 2008. godini i Prijedlog Programa rada za 2009. godinu dostavila je Vlada Federacije Parlamentu Federacije radi razmatranja i usvajanja.

Predstavnički dom je na nastavu 22. sjednice od 03.06.2009. godine prihvatio Izvještaj o radu Zavoda zdravstvenog osiguranja i reosiguranja Federacije Bosne i Hercegovine u 2008. godini i Prijedlog Programa rada za 2009. godinu.

Izvještaj i Program rada razmatrala su nadležna radna tijela i dostavila svoje izvještaje.

U raspravi nije niko učestvovao.

Na osnovu rezultata glasanja, predsjedavajući je konstatovao da je Dom naroda Parlamenta Federacije Bosne i Hercegovine jednoglasno (37 glasova) prihvatio Izvještaj o radu Zavoda zdravstvenog osiguranja i reosiguranja Federacije Bosne i Hercegovine u 2008. godini i Prijedlog Programa rada za 2009. godinu.

* * *

Sjednica je završena u 16.55.

Transkript sjednice čini sastavni dio Zapisnika.

SEKRETAR

PREDSJEDAVAJUĆI

Izmir Hadživdić

Stjepan Krešić